

Powšitkowne WOZJEWJENJA

njedźelu, 3. februara 2013

Hłowna a wólbna zhromadźizna TCM

Předsydstwo Towarstwa Cyrila a Metoda z.t. (TCM) přeprošuje wšitkich člonow towarstwa, člonow sekcijow a korporacijow kaž tež zajimowanych hosći na swoju hłownu wólbnu zhromadźiznu štwórtk, 14. februara, do Pančic-Kukowa. Započnjemy we 18.30 hodž. z Božej mšu w klósterskej cyrkwi. Přizamknje so zhromadźizna we wosadnicy. Na njej wuzwoli so nowe předsydstwo. Sčěhowsacy dnjowy porjad je předwidžany:

1. zahajenje
2. wólba nawody zhromadźizny
3. rozprawy předsydstwa, nawodow korporacijow a sekcijow
4. financna rozprawa
5. rozprawa rewizijneje komisije
6. schwalenje rozprawow
7. wuzwolenje wólbneje komisije
8. wólby noweho předsydstwa a rewizijneho wuběrka
9. diskusija
10. zakónčenje / modlitwa

Jurij Špitank, předsyda TCM

Nyšpor k wopomnjenju zbóžneho Alojsa Andrickeho

Radworska wosada přeprošuje wěriwych ze wšitkich wosadow na wopomnjenskim a zdobom smjertnym dnju zbóžneho martrarja Alojsa Andrickeho tutu njedźelu, 3. februara, w 14 hodž. k nyšporu do Radworskeje cyrkwy. Na nim podadža so wšelake nastorki a impulsy z jeho listow.

Zhromadny dzeń za 1. a 2. lětnik

Pod hesłom „Nowy spočatk“ přeprošuje Dekanatne dušepastyrstwo šulerki a šulerjow 1. a 2. lětnika sobotu, 16. februara, wot 9 do 15 hodž. na zhromadny dzeń do Don Boskoweho domu we Worklecach. Zajimcy njech so prošu hač do wutory, 12. februara, pod telefonowym čisłom (03 57 96) 8 87 07 we Worklecach přizjewja. Za wudawki dnja zhromadźi so wot kóždeho wobdźělnika přinošk we wysokosći třoch eurow.

Swjaty mision w Radworju

„Wótče naš“ – žiwy być a wěrić w počahach“ rěka tema swjateho misiona lětsa w Radworju. Tute dny wobnowjenja a pohłubšenja we wěrje budžeja wot srjedy, 20. februara, hač do njedźele, 3. měrca. Tež wěriwi z druhich wosadow su wutrobnje na swjaty mision w Radworskeje wosadze přeprošeni. Konkretny přehlad Katolski Posoł hišće wozjewi.

Serbske kemše w Drježdžanach

Serbja, jich přiwuzni a přečeljo su wutrobnje přeprošeni na serbske kemše njedźelu 10. februara, w 17 hodž. do cyrkwy swjateho Antonija w Drježdžanach Löbtauwe, Bünauska dróha 10. Božu mšu woswjeći farar Gabriš Nawka. Po kemšach zetkamy so na bjesadu na farje. *M. Bubnarjec*

Putniska jězba z busom do sewjerneje Italskeje

Lětuša putniska jězba wot soboty hač do štwórtka, 14. do 19. septembra, powjedže nas do sewjerneje Italskeje. Hłowny cil je město swjateho Antonija, Padua, hdžež je tež jeho row. Wobhladać chcemy sej mjez druhim město Verona, wokolinu Gardaskeho jězora, hdžež budžemy přenocować. Wopytamy tohorunja hnadowne městno Madonna della Corona. Dalše informacije dóstanjeće pod telefonowym čisłom (03 57 96) 9 40 37.

Matthias Hadank

Zhromadne posćenje

Sonja Hrjehorjowa poskičuje tež lětsa w Sulšecach zhromadne dny posćenja. Prěni kurs – přewažnje němsce – započnje so wutoru, 26. februara, a skónči so póndželu, 4. měrca, z łamanjom posćenja. Druhi kurs – přewažnje serbsce – budže wot srjedy, 6. měrca, hač do wutory, 12. měrca. Naprašowanja a přizjewjenja su móžne hač do srjedy, 20. februara, pola Sonje Hrjehorjoweje, Sulšecy 42, 02997 Kulow, telefonowe čisło (03 57 25) 7 05 60.

Pěši do Częstochowy

Tež lětsa pozbudža farar Beno Jakubaš, so w serbskej skupinje na putnikowanje z Waršawy do Częstochowy podać. Hić smě kóždy sobu, kotryž je 18. žiwjenske lěto docpěł. Termin putnikowanja je wot 5. do 15. awgusta. Zajimcy njech so bórže přizjewja pola fararja Bena Jakubaša w Njebjelčicach, telefonowe čisło (0 35 78) 30 20 05.

Koncert z Lipšćanskim smyčkowym kwartetom

Nowy komornohudźbny rjad w Budyskim Serbskim ludowym ansamblu (SLA) zahaji njedźelu, 10. februara, w 16 hodź. Lipšćanski smyčkowy kwartet. Wón je w Němskej a wukraju jedyn z najpožadanišich mnohostronskich ansamblow přitomnosće. W swojim repertoiru ma tež serbske kompozicije, na přikład Jana Pawoła Nagela a Bjarnata Krawca. Wšitcy lubowarjo komorneje hudźby su wutrobnje do SLA přeprošeni.